

ხიბულაში, ზვიად გამსახურდიას სახლ-მუზეუმის გვერდით ტაძრის მშენებლობა მიმდინარეობს



სოფელ ძველ ხიბულაში, ზვიად გამსახურდიას მემორიალური სახლ-მუზეუმის გვერდით ტაძრის საფუძვლის კურთხევა მოხდა. წმინდა ლაზარეს აღდგინების სახელობის ტაძართან ერთად, ტერიტორიაზე სამრევლო სკოლა და სამრევლო აშენდება, მოეწყობა სკვერი.

ეკლესიის საძირკველი დღეს ფოთისა და ხობის მიტროპოლიტმა გრიგოლმა ეპარქიის სამღვდელოებასთან ერთად აკურთხა. კომპლექსის მშენებლობას ფონდი „ქართუ“ აფინანსებს.

კურთხევის ცერემონიალს, ადგილობრივ მოსახლეობასთან ერთად, სამეგრელო-ზემო სვანეთის სახელმწიფო რწმუნებული ალექსანდრე მოწერელია, ხობის მერი გოჩა ქაჯაია და პარლამენტის წევრი ირაკლი (დაჩი) ბერაია დაესწრნენ.

ძველ ხიბულაში გვიად გამსახურდიას მუზეუმის სარეაბილიტაციო სამუშაოები დასრულების ეტაპზეა. სოფელში უკვე დასრულდა ორსართულიანი საბავშვო ბაღის მშენებლობაც. ტაძრის მსგავსად ამ პროექტებსაც „ქართუ ჯგუფი“ ახორციელებს.

სოფელ ძველ ხიბულაში ეკლესიის, ახალი საბავშვო ბაღის აშენებას და გვიად გამსახურდიას მუზეუმის გახსნას ადგილობრივ მოსახლეობას ბიძინა ივანიშვილი 2019 წლის 29 მარტს დაჰპირდა, როცა „ქართული ოცნების“ ლიდერმა ძველ ხიბულაში ის სახლი მოინახულა, სადაც გვიად გამსახურდიამ სიცოცხლის ბოლო დღეები გაატარა.

ინფორმაციას სამეგრელო-ზემო სვანეთის სახელმწიფო რწმუნებულის აპარატი ავრცელებს.